

Ei wo issen moin Schlissel?

Vor e paar Daach hott mich owends um korrz noch Zeh de Schorsch oogerufe. Mensch, Honnes, hotter gesaad, ich glaab, ich muss die gons Nacht wach bleiwe. Kann isch derr noch was verzähle odder isses schunn ze spät?

Naa, Schorsch, saach ich, mir gugge grad noch e bissi Fernseh. Was issen los? Warum mussde die gons Nacht wach bleiwe?

Honnes, seet de Schorsch, dess Kättche war doch heit mett unserne Dochder nooch Meenz zum Oikaafe gefahrn. Ich bin so geesche Drei in die Kolonnade geloffe unn wie ich später hoomgonge bin unn die Hausdier uffschließe wollt habb ich gemerkt, dass ich moin Schlissel verlorn habb. Ei wo issen moin Schlissel?, habb ich vor mich hie gekrische, weil ich konnt joo nitt ins Haus. Also bin noch emol zurigg unn habb de gonse Weesch abgeseuchd, awwer de Schlissel war fort, unn dann bin ich hoom unn habb in unserm Gaddehittsche wadde misse bis die Fraa so geesche Siwwe hoomkumme iss.

No ja, saach ich, dess kann merr doch verkrafte, odder?

Ja, kunn merr schunn, gibt de Schorsch ze Antwort, awwer stell derr vor, wenn ooner moin Schlissel gefunne hott, konner doch bei uns heit Nacht gons gemiedlich oibreche.

Schorsch, saach ich, woher soll ooner, der de Schlissel finne dut, wisse, dasses doin Schlissel iss? Stieht doo was droo?

Naa, seet de Schorsch, awwer wenn ich den verlorn habb unn wenn dess ooner gesehe hott, den uffgehowwe hott unn mir noochgonge iss, dann waaßer, wo der basse dut. Dann braucher nor ze wadde bisses dunkel iss unn donn konner ins Haus. Unn desdeweese will ich die gons Nacht wach bleiwe.

Ich saach: Schorsch, mir mache mol Schluss ferr heit. Jetz ab ins Bett, dort dusde zum heilische Antonius bete unn moie giehsde ins Stadtbüro, die hawwe e Fundbüro, unn dort iss bestimmt doin Schlissel abgewwe worrn.

Omm nächsde Daach iss de Schorsch bei mich kumme. Honnes, hotter gesaad, dess meddem Antonius unn meddem Fundbüro, dess war enn gude Tipp. Isch habb dort nooch emm Schlissel im rode Mäppsche gefroochd unn werklisch hott e Fraa moin Schlissel uff de Gass gefunne unn hotten gleich dort abgewwe, ess gibt noch ehrliche Leit.

Schorsch, saach ich, siehsde. Awwer du konnst doch in doim Gaddehittsche enn Schlissel versteckele unn wennde widder mol ooner verlierst, dann konnsde ins Haus.

Naa, naa, seet de Schorsch, in de Gaddehitt enn Schlissel versteckele? Naa, dort konnen aach ooner finne unn donn hotters gons leicht meddem Oibreche. Isch machs gons onnersders.

Ich frooch: Ei wie mächsde dess donn, Schorsch?

De Schorsch hott gegrinsd. Dess mach ich su: Ich gebb emm Bub uff de Gass moin Schlissel, jetz awwer den im griene Mäppsche, saach emm, den hädd ich grad gefunne unn er sollen doch ins Fundbüro brenge, ich deet emm aach enn Euro gewwe. Unn wenn ich widder mol moin Schlissel im rode Mäppsche verlorn habb, dann frooch ich dort, iss bei Eich enn Schlissel abgewwe worrn, so ooner in emm griene Mäppche, dann saache die: Ja, doo isser, unn ich konnen grad mettnumme. Genial, odder?

Genial, Schorsch, saach isch, du konnst ins Haus, awwer du musst donn widder zum Antonius bete, weilde joo den Schlissel im rode Mäppsche suche dust.

Doo hott sich de Schorsch omm Kobb gekratzt unn gesaad: Doo hosde aach widder recht. Ei doo muss isch merr joo was onnersders oifalle losse.